

24. januar 2022

UPA2022/36

Inatsisartut Suleriaasianni § 36 innersuussutigalugu apeqquteqaat allaavigalugu Inatsisartuni oqallisissiamik siunnersuut imaattoq saqummiuppara:

**Qanoq iliorluta nunatsinni inuussutissarsiutigalugu piniartut qilalugartaasa neqaanik pisortat ingerlataasa atuinerusinnaanissaat qulakkeerneqarsinnaanersoq pillugu inatsisartut apeqqutaat aallaavigalugu oqallisigisassaattut siunnersuut.**

(Siumup Inatsisartunut ilaasortaaitai)

**Tungavilersuut:**

Tamatta ilisimavarput qilalukkap mattaa neqaanik annertunerujussuarmik inunnik pisiariortorneqarpoq. Ajoraluartumilli neqaata siammartertarnera annertugisassaangilaq. Annertuallaannginneranut pissutsit arlaqarsinnaapput. Ilaatigut nassiussuinermi neqip oqimaatsuunera inituneralu akisuallaalertarneranut pissutaasinnaavoq.

Tusartualernikuuarput ajoraluartumik sinerissatta ilarujussuani utoqqaat illuini najugaqartut utoqqaallumi utoqqalinersiaannarnik isertitaqartut qaqutiginnaq qilalukkap neqaanik ilangiisalersimasut. Utoqqaat illuini najugaqartut inuunerissaarnerulersinniarlugit qilalukkap neqaanik sassaalliinerusoqarsinnaavoq, taamaasillunilu aamma piniartunut tapersersuineq takutillugu.

Aqutissiuussinissamut peqqusinermi ilanngullugittaaq taanngitsoorneqarsinnaanngillat sinerissami meeqqeriveqarfippassuit qilalukkap neqaanik "takussaarnikut" ilanngunneqarnissaat.

Taakkuinnaanngillalli aqajaqqumut sassaalliisartut. Pisortat ingerlataani nerisarfippassuupput qilalukkap neqaanik sassaalliinerujussuusinnaasut, neqisiffissaaleqiinnarlutilli. Aporfiusumik suugaluarnersumik aaqqitassaqarpugut. Soorlu oqareernittut assartuinermut aningaasartuuteqarpallaanerua? Imaluunniit tunitsivissaaleqinermeersuaa?

Siumumiit isumaqarpugut, qilalukkat neqaat annertunerujussuamik pisortani atortariaqarivut. Aap, piniartortavut tapersersorniarlugit, aammali pisortani sulisut atuisullu allat inuunerissaarnerusinnaanissaannik periarfissinniarlugit, pingaartumik qilalukkap neqaanik atorluannikkut.

Taamaattumik qanoq iliorluta inuussutissarsiutigalugu piniartut qilalugartaasa pisortat ingerlataat aqutigalugit piniartunut iluaqutaanerulersissinnaanerivut, illuatungaanilu aamma innuttaasut kalaaliminertornerulernissaat angusinnaassaneripput.

Qilalugartassat ullumikkut amerlagisassaangereersut inuiaqatigiinni neqissaqarniarnikkut annerpaamik iluaqutiginiarneqarnissaat tamatta siunertarisariaqarparput. Taamaattumik Inatsisartut qanoq uunga oqallisissiamut ilanngussassaqarnersut, aammalu ajornartorsiutaasartut qanoq aaqqinniarneqarsinnaanerivut oqariartuutissaqarnersut tusassallugit qilanaarivakka.

Maani oqallinnissatsinnut isummasi tusassallugit qilanaaralugu.

Oqallilluarnissassinnik kissaappassi!

